


Zimbabwe Coalition on Debt and Development MUNONGEDZO WEVAGARI VENHARAUNDA



Investing in People
For Social and Economic Justice

kuti vave nechokuita mushandiswa kwezviwanikwa zviri munharaunda mavo

Nhanganyaya

Donzvo rekurudziro ino ndeyekuti vagari venharaunda vave nechikamu chavanobata mukushandiswa kunoitwa zviwanikwa zviri munzvimbo mavo. Zviwanikwa zvinosanganisira ivhu, zvicherwa, mvura, mhuka, matombo, miti nemasango nezvimwewo zvakasiyana siyana ndihwo hupfumi hwenyika hwakakosha. Naizvozvo kushandiswa kana kuti kumorwa kwezviwanikwa kunofanirwa kuunza pundutso mumagariro evanhu ne budiriro munzvimbo.

Kubva pasichigare vanhu vaivimba nezviwanikwa kuwana raramo. Zvisinei kupinda kwemakambani makuru nekutengeswa kumisika kwezviwanikwa zvakonzera kuti kodzero nemagariro evanhu akanganisike. Pane dzimwe nhambo vagari venzvimbo vari kutopinza muhurombo zvisinei nekuti zviwanikwa zvemunzvimbo mavo zviri kumorwa zvichiwanisa mari kune vari kuzvimora.

Dudziro Yemanzwi

Nharaunda

Vanhu vanogara mudunhu rimwe chete kana vanhu vane matambudziko akafanana.

Zviwanikwa

Izvi zvingava zvicherwa, ivhu, miti, masango, mhuka dzesango, mvura nezvimwe zvakadaro, zviwanikwa izvi zvikasashandiswa nemazvo zvinogona kupera.

Kutongwa Kwakanaka Kwezviwanikwa

Zvinosanganisira kuti ndevapi vanokwanisa kushandisa uye vane masimba maererano nemashandisirwo anoitwa zviwanikwa.

Hutungamiriri Hwakanaka

Mukushandiswa kwezviwanikwa zvinotarisirwa kuti vatungamiri vaite mabasa avo pachena nenzira yakajekera uye inobatsira vanhu vese, vachitevedza pfungwa dzevanhu uye vachipa vanhu vese mukana wekutaura zvavanoda netarisiro dzavo.

Nhoroondo Yekushandiswa Kwezviwanikwa mu Zimbabwe

Nyika yedu ye Zimbabwe ine hupfumi hwakawanda kwazvo nezvicherwa zvakananda zvakaita se goridhe, simbi, koromo, matombo mashava nematema, miti, hove, mhuka dzesango nezvimwe zvakananda zvatisingakwanisi kudoma zvese muchinyorwa chino. Zvakakosha kuve neyeuchidzo yekuti zviwanikwa zvikasashandiswa nemazvo zvinogona kupera zvachose. Zimbabwe ine mhando dzezvicherwa dzinopfuura makumi mana (40) uye makambani madiki nemakuru anopfuura mazana masere (800) vari kuita mabasa ekuchera zviwanikwa munyika muno. Nyangwe zvakadaro zvinoonekwa kuti ruzhinji rwevanhu muZimbabwe havasi kuwana pundutso kubva mukushandiswa kwezviwanikwa.

zvekuita:

- Nyorai pasi zviwanikwa zviri munharaunda menyu
- Domai makambani ari kumora zviwanikwa munharaunda menyu.

Nharaunda Inei Nechokuita Mukutongwa Kwezviwanikwa?

Sangano re Zimbabwe Coalition on Debt and Development (ZIMCODD) rinokoshesa zvikuru kuti vagari venharaunda vapinde muzvirongwa zvine chekuita nekodzero dzavo sevanhu, uye kodzero dzezvehupfumi nemagariro akanaka. Kuburikidza ne bumbiro remitemo reZimbabwe vanhu vanofanirwa kupiwa mikana yekupa pfungwa dzavo mukutongwa, kuitwa nekuongororwa kwezvirongwa zvemunharaunda kusanganisira mashandisirwo anoitwa zviwanikwa. Bumbiro remitemo renyika yeZimbabwe, Chikamu Chechina (Chapter 4) rinoratidza zvizere kodzero dzevanhu dzinofanirwa kuzadziswa. Kodzero idzi dzino sanganisira mukati kodzero dzeruzhinji pamwe nematongerwo enyika, kodzero yemagariro evanhu nehupfumi, tsika, nekodzero dzezvakatikomberedza (Civil, Political, Social, Economic, Cultural and Environmental Rights). Kodzero dzevanhu dzinogona kupatsanurwa dzichiiswa mumapoka matatu;

i) Kodzero Dzeruzhinji Pamwe Nematongerwo Enyika (Civil and Political Rights): Dzinoganganisira kodzero yehupenyu, kuvhota nekupinda mune zvevatongerwo enyika.

ii) Kodzero Dzemagariro Evanhu, Hupfumi Netsika (Social, Economic and Cultural Rights): Dzinobata magariro evanhu zuva nezuva, kusanganisira kuwana mvura yakachena, hutano, dzidzo, kushanda mabasa anowanisa hupfumi.

iii) Kodzero Dzezvakatikomberedza (Environmental Rights): Dzinobata kushandiswa kwezviwanikwa nenzira yakafanira inoita kuti zviwanikwa zvirambe zvichibatsira vanhu.

Kodzero dzose idzi dzinobatana zvakananyanya kuunza magariro akanaka nezvehupfumi nekuderedza hurombo muvanhu.

Sei Nharaunda Ichifanirwa Kuve Nechokuita Mukutongwa Kwezviwanikwa.

- Vagari venharaunda ndivo vanogona kutsetsenura zvavanoda mukurarama kwavo, uye kutonga kuti zviri kuzadzikiswa here kana kuti kwete. Naizvozvo zvakanakosha kuti munhu wese ave nechokuita nazvo uye inzwi rake richinzwikwa.
- Nharaunda inoubwa nevanhu vakasiyana siyana vane mafungiro, mazano ne tarisiro dzakasiyana. Kukokorodza vanhu inzira inoita kuti ruzivo rwevanhu vakasiyana siyana, uye zvivo zvavo zvive zvinogamuchirika zvichibva kumapoka akasiyana siyana munharaunda anosanganisira vanhukadzi nevarume, vechidiki, vakwegura, vakaremara nevasina, vemarudzi kana mutauro yakasiyana.
- Kana vanhu vakawanda vaine chekuita nezvezviwanikwa munharaunda yavo zvinopa mushandirapamwe munharaunda nekuchengetedzwa kwezviwanikwa.

Kushaiswa mikana yekubatira pamwe muzvirongwa zvenharaunda zvinoita kuti vamwe vasarire vari kunze zvowedzera hurombo nekushaya simba muvanhu.



Mitemo Inobata Kushandiswa Kwezviwanikwa muZimbabwe

Kuziva mitemo inobata mashandisirwo ezviwanikwa zvinobatsira kuti mitemo igadziriswe nekuvandudzwa kuitira kuti vanhu vawane zvinobatika kubva muzviwanika zvenyika. Imwe yemitemo inobata zvezviwanikwa ndeyi;

- Mines and Minerals Act
- Indigenisation and Economic Empowerment Act
- Regional, Town and Country Planning Act
- Urban Councils Act
- Environmental Management Act
- Forest Act
- Minerals Marketing Corporation of Zimbabwe Act
- Rural District Council Act
- Zimbabwe Water Act

Kazhinji zhinji munzvimbo dzine zviwanikwa vanhu vanosangana nedambudziko rekuparadzwa nekukanganiswa kwenharaunda zvichibva mumabasa ekumora zviwanikwa kunenge kuchitwa nemakambani nevanhu kunyangwe zvazvo pasina zvinobatika zvinosara munharaunda. Nyaya dzakafanana nekukanganisika kwezviwanikwa nemagariro evanhu hadzisi kunyatso ongororwa zvakanakwana panoitwa mabasa ekumora zviwanikwa. Naizvozvo zvakanakosha kuti vagari venharaunda vawane chokuita mukuronga mashandisirwo anoitwa zviwanikwa kuburikidza nezvinotevera;

a) Panotangwa Wongororo Nematikambani

Mamwe makambani ane tsika yekutanga kutsvaga zvicherwa pasina hurukuro nevagari venzvimbo, zvakanakosha kuti pave nenhaurirano yakajeka vematikambani vachizivisa vagari zvavari kuda kuita. Vatungamiriri venharaunda vakaita seNhengo dzedare reparamende, vekanzuru, nevatungamiriri vepasi chigare nevagari vese venharaunda vane basa rekuva ziso renzvimbo naizvozvo vanofanirwawo kuzivisa. Pari zvino mutemo we Mines and Minerals Act sezvauri hauna kunyatsorurama, uri kupa masimba akawandisa kune gurukota re zvevigodhi mukupa mvumo kumakambani. Mukutevedza zviga zvekutongwa kwakanaka kwezviwanikwa zvakanakosha kuti zvibvumirano pakati pe hurumemende nemakambani zviitwe pachena vanhu vachibatsira kuongorora zviga zvinofanirwa kuzotevedzwa. Izvi zvinobatsirawo kuderedza huwori hupfumi hwenyika hwochengetedzeka nekubatsira veruzhinji.

Makambani asati atanga kuchera vanosungirwa kuita ongororo ye Environmental Impact Assessment iyo inotarisa kuti

zviwanikwa nenharaunda zvichakanganisika kana kuvandudzika sei kubva mumabasa avachange vachiita uye zvii zvingaitwe kuderedza kukanganisika kungavepo kuburikidza nemabasa avo. Mukuitwa kweongororo idzi zvakakosha kuti vagari venharaunda vave nechokuita sezvo vari ivo vanoziva nzvimbo yavo zvakanyanya kupfuura vekunze. Kana kambani yatanga mabasa vanhu venharaunda vanofanirwa kuramba vachiongorora kana kambani isiri kutyora zvayakavimbisa kuita.

zvekuita:

- Tsanangurai kufambidzana kwamuri kuita nenhaurirano dziripo nemakambani ari kushanda munharaunda yenyu.
- Kurukuriranai zvakanaka nezvakashata zvamuri kusangana nazvo kubva mukumorwa kuri kuitwa zviwanikwa munharaunda yenyu

b) Panotanga Makambani Kushandira Munzvimbo

Vagari venharaunda vanokurudzirwa kuramba vari munhaurirano vachifambidzana nemakambani ari munzvimbo mavo vachionesana zviri kuitika zvakaita sekukanganisika kwenharaunda kuitira kuti zvigadziriswe nekukurumidza. Semuenzaniso kukanganiswa kwemvura, mweya, kuraswa kwemarara panzvimbo dzisina kukodzera, kukanganiswa kwehutano, kuparadzwa kweminda nemafuro uye kuti izvi zviri kuvhiringidza sei mararamiro evanhu.

Kana nepo zvakakosha kuti vatungamiriri vezvirongwa zvebudiriro munzvimbo, vatungamiriri vepasi chigare, vamiriri mudare reparamemende nevanhu varonge misingano yehurukuro. Hazvifanirwe kutorwa sekuti vatungamiriri ndivo vega vanotaura pamusoro penharaunda zvekuti vamwe vanhu vese havachanzwike pfungwa nezvido zvavo. Nhaurirano idzo dzinofanirwa kuita mukutaurirana nekupana mazano kwakanaka.

c) Panovharwa Mugodhi

Pane zvikonzero zvakanaka zvinoita kuti makambani avhare, sokuti zviwanikwa zvinogona kupera kana kuti mitengo pamisika inodzika zvekuti basa harichagoni kuenderera mberi sezvakaitika nemigodhi ye Empress Gold Mine, Kamativi Mine ne Shabhanie Mine neimwewo. Panovharwa mugodhi nharaunda nevashandi havanyanyi kucherechedzwa kuti ramangwana ravo rinozovei. Nharaunda inogona kusiiwa yakakanganisika semuenzaniso makomba anosara asina kuvharwa zvopa njodzi kuvagari nezvipfuwo. Zvakakosha kuti pagare paine hurongwa hunozivikanzwa nemakambani, hurumemende nenharaunda kuti pakuvharwa kwemugodhi zvinhu zvichafambiswa sei.

d) Masangano ekupa Nharaunda Mugove Kubva Mukushandiswa Kwezviwanikwa (Community Share Ownership Trusts)

Hurongwa hwemasangano ekupa nharaunda migove mukana wekuti vagari venharaunda vawane pundutso uye kuva nechokuita mukushandiswa kwezviwanikwa nemakambani ari munzvimbo dzavo. Zvakakosha kuti vagari vave nechokuita mukufambiswa kwemabasa emapoka aya sezvizvi;

Kupa Mazano Nepfungwa Maererano Nezvirongwa Zvebudiriro (Projects) - Zvirongwa zvinoitwa neboka remugove zvinofanirwa kubva kuvanhu. Vashandi ne vatungamirira veboka vanotarirwa kupa vanhu mukana wekutaura matambudziko avanoda kuti agadziriswe munharaunda mavo kuti upenyu hwavo hwuwandudzike.

Mafambisirwo emari Yeboka Remugove - zvakanodzera kuti vagari vemunharaunda vazive mari dzapiwa kuboka uye kuti ichashandiswa sei.

Kushanda Nenzira Yakajeka Zviri Pachena (Accountability) - kushanda zviri pachena zvinosanganisira kuzivisana zviri kuitika nezviri kurongwa. Vashandi veboka remugove ne vatungamiriri vanotarirwa kuzivisa mashandiro avanenge vachiita, kutengwa kwezvinhu nekupa mabasa zvichiitwa nenzira yejekere kuti pasave nekurasikirwa nemari kuburikidza nemabasa ehuwori.

Kuita Mabasa Pazvirongwa Zveboka - vagari venharaunda vanogonawo kupa ruzivo nehunyanzvi hwavo kuboka renzvimbo yavo vachiita mabasa pane kuti boka ritsvage makambani ekunze. Semuenzaniso boka remugove reShurugwi Community Share Ownership Trust rakakwanisa kuvaka dzimba dzevakoti mbiri vachishandisa vavaki vemudunhu mavo vakashandisa mari yakaenzana neyavakange vabhadhara kambani kuti ivake imba imwe chete. Izvi zvinoreva kuti boka remugove rinokwanisa kuita zvirongwa zvebudiriro zvakanaka nekuchengetedza mari.

Zvinofanirwa Kuzivikanwa Pamusoro Peboka Remugove Wenharaunda

- Zivai kune ma hofisi eboka, vashandi, nhengo dzinotungamirira boka uye nguva dzinoitwa misangano yekuronga mafambisirwo ebasa reboka.
- Nyatsozivai miganhu yenzvimbo inobatwa neboka remugove.
- Mabasa ebudiriro akaitwa, ari kuitwa uye kuti boka rinotambira sei pfungwa kubva kuvanhu.

Ruzivo Pamusoro Pekukorodza Veruzhinji Kuti Vave Nechokuita

Pakorodzo yekuti munhu wese ave nechokuita pazvirongwa zvenharaunda zvakanaka kuti vanhu vazive zviri kuitika. Zvidobi zvakanaka zvinogona kushandiswa kuti vanhu vazive zviri kuitika munzvimbo zvakanaka se kupa zvinyorwa paimba neimba, panzvimbo dzinongana vanhu dze kutandarira, nzvimbo dzema bhizimisi, muzvikoro, zvipatara, makereke, nemunzira dzinofamba nevanhu.

Kufambisa Mashoko Nenhaurirano

Mashoko anogona kufambiswa nekutaurirana pamisangano kana mukufambidzana kunoita vanhu. Itai kuti mashoko echokwadi agare achifambiswa nevanhu vakavimbika, zvinogona kupiwa sechiziviso kumakereke, pagungano remumusha kana muzvikoro. Zvakakosha kufambisa mashoko nenhaurirano kutsigira zvinyorwa zvinenge zvapiwa sekuti vanhu vanonyanya kucherechedza zvavanzwa kudarika zvekuverenga.

Zivo Pamusoro Penhaurirano

Pakugadzirisa zvinhu munharaunda zvinokosha kuti pave nenhaurirano inorunzira shanduko pamamiriro ezvinhu murunyararo. Nhaurirano yakanaka inovepo kana vanhu vachifambisa mashoko zvakanaka, vachiziva zvinoda kugadziriswa nekukokorodzana kuita mushandirapamwe senharaunda kugadzirisa matambudziko.

Mushandirapamwe pakuita zvinhu nekutora matanho unobuda kana paine kujekeserana pamusoro pezvinoda kuitwa, mikana kana zvimhingaidzo zvinogona kukanganisa nhaurirano. Ngazvive pachena kuti ndezvipi zviri kuda kuitwa semuenzaniso kuwedzerwa kwemitero kumakambani ari kumora zviwanikwa, kuburitswa kwemashoko pamusoro pemakambani awa, kuiswa kwemitemo nezvisungo zvinoita makambani atenge zvekushandisa munharaunda dzavari nekuwanisa vagari vemudunhu mikana pamabasa.

Munhaurirano zvinokosha kuti pave nemutauriri akavimbika, anogona kunyatsotsanangura zvido zvenharaunda uye anechiremerera. Zvakakoshawo zvekare kushandisa mashoko ane chekuita nyenya iri kuda kugadziriswa kuitira kuti dambudziko nemazano ari kupiwa zvijike.

Kushandisa Misangano Nemitambo Kuita Nhaurirano

Pakugadzirisa nyaya dzese dzabva kunharaunda munogona kuronga misangano nemitambo yehurukuro. Zvingabatsire pakuronga musangano unobudirira;

Kushandisa Misangano nemitambo kuita nhaurirano

- Taurirai nekukoka vese vane chekuita nyenya dzezvekutongwa kwezviwanikwa, kusarudza nguva yakafanira ne nzvimbo yakasununguka kune vakokwa.
- Gadzirai zvichada kukururwa (agenda) pachine nguva, zvinobatsira kutsvaga ruzivo nemashoko pamusoro penyaya dzichakururwa.
- Kana zvichenderana kukoka vedzinhau vauyewo pamusangano.
- Zvakakosha kuchengetedza nguva dzekutanga nekupedza musangano
- Zvinokosha kuziva vanhu vachauya nekugadzirira kuti vachataurwa navo sei.

ZIMCODD ine muwono wekuti nharaunda dzipinde mukutongwa kwezviwanikwa kuitira kuvandudza magariro nezvehupfumi kuvana ve Zimbabwe. Maringe ne bumbiro remitemo renyika ye Zimbabwe kodzero dzezvemamariro nehupfumi dzakakosha. Hupfumi hwenyika yedu huri muzviwanikwa zvakawanda zvatiinazvo naizvozo zvakakosha kuti zviwanikwa zvisimudzire nekupedza hurombo kuvana ve Zimbabwe.

Mareferenzi

1. http://www.constituteproject.org/constituion/Zimbabwe_2013.pdf (accessed 15 July 2016)
2. <http://www.who.int/chp/advocay/chp.manual.EN-webfinal.pdf> (accessed 15 July 2016)
3. <http://www.socialventures.com.au/sva-quarterly/seven-steps-to-effective-advocacy> (accessed 18 July 2016)
4. ZELA (2014) Community Rights and Engagement with Mining Companies. Zimbabwe Environmental Law Association, Harare
5. ZIMCODD (2015) Training Manual on Activism in the Extractive Sector. ZIMCODD, Harare.
6. USAID, 2015; Guidelines for Learning and Applying the Natural Resource Governance Tool in Landscapes and Seascapes.



Investing in People
For Social and Economic Justice

ZIMCODD Contact Details
Head Office:
226 Samora Machel Ave, Eastlea, Harare
Tel: +263-4-776830
Email: zimcodd@zimcodd.co.zw

Bulawayo Office:
2nd Floor ZIMDEF House, East Wing,
Cnr Fort Street/ 9th Avenue, Bulawayo
Tel: +263-9-886594/5
Email: zimcoddbyo@gmail.com

www.zimcodd.org



Twitter: Zimbabwe Coalition
on Debt and Development
Handle: @zimcodd1



Facebook: Zimbabwe Coalition
on Debt and Development
Account: Zimcodd Zimcodd

Supported By:



NORWEGIAN CHURCH AID